

MSM kembali catat untung

KUALA LUMPUR: MSM Malaysia Holdings Bhd (MSM) kembali mencatat keuntungan bersih RM14.33 juta pada suku kedua berakhir 30 Jun 2018, berbanding kerugian bersih sebanyak RM21.45 juta dalam tempoh yang sama setahun lalu.

Pendapatan bagaimanapun merosot 17.1 peratus tahun ke tahun kepada RM573.22 juta berbanding RM691.11 juta sebelumnya, ekoran pengurangan tujuh peratus jumlah jualan keseluruhan dan harga jualan purata yang lebih rendah.

Dalam makluman kepada Bursa Malaysia hari ini, MSM berkata prestasi yang bertambah baik itu disumbangkan oleh pengurangan kos bahan mentah dan kadar tukaran asing yang lebih baik.

Mengenai prospeknya, MSM berkata separuh kedua 2018 diunjurkan mencabar, memandangkan potensi perubahan dalam dasar gula domestik dan persekitaran pasaran yang mencabar.

"Bagaimanapun, kumpulan itu mengekalkan unjuran positifnya dan berusaha untuk meneruskan inisiatif strategik supaya terus berdaya tahan dan menguntungkan," katanya. - BERNAMA

<https://www.bharian.com.my/bisnes/korporat/2018/08/465487/msm-kembali-catat-untung>